

Inatsisartut suleriaasianni § 37 naapertorlugu matumuuna Naalakkersuisunut apeqquq imaattoq saqqummiuppara.

**Apeqquq:**

**Avannaani aalisartoqarfissuarni talittarfeqarnikkut pitsanngorsaaniissamik qanoq pilersaaruteqartoqarpa?**

(Inatsisartuni ilaasortaq Jess Svane, Siumut)

**Tungavilersuut;**

Ukiorparujussuannngortuni pingaartumik avannaani aalisartoqarfissuarni inoqarfiit arlallit talittarfeqarnikkut umiarsualiveqarnikkullu pitsanngorsaavigineqarsimanngillat.

Taakkununga ilaapput Kangaatsiaq. Ajoraluartumik talittarfeqarnikkut umiarsualiveqarnikkullu inissisimanerlunneq peqqutaalluni ukiut tamaasa aningaasarpassuarnik nalilinnik angallatitigut annaasaqartoqartarpoq.

Taassuma saniatigut inuit nassiussallu nunamiit nunamullu nuunniarnerat ajornartorsiorfiusarpoq talittarfiluttoqarneranik pissutilimmik.

Aammattaaq taakkununga ilaavoq Uummannami umiarsualivik. Tassani aamma akuttunngitsunik iluliarsuit sarsuasut aserornerannik peqquteqartumik angallatit “qaarunneqarlutik” ajutoortarput. Qulaani taasakka ajornerpaamik inissisimasuummata eqqaavakka, allat aamma umiarsualiveqarnikkut inissisimanerluttut ilisimaarineqarluassasut naatsorsuutigalugu allanik eqqaasaqanngilanga.